

SERMO
AUGUSTINO TRIBUTUS
DE RUSTICIANO SUBDIACONO

A DONATISTIS REBAPTIZATO ET IN DIACONUM ORDINATO.

I. ADHUC mōrens et dolens (3), fratres, sisto me Sanctitati vestræ: nec enim præteriti casus (dicam mei, dicam vestri?) dolorem potui digerere. Ter conatus sum verbum, unde debitor sum, vobis subministrare; toties et meæ et vestræ lacrymæ conantis vocem suppresserunt: nec potui melius curas quibus premebar, quam ubertate lacrymarum explicare. Quid ergo fiet? Nunquam-ne meo, nunquam vestro luctui limes statuetur? Quoties me videbitis intrantem, non cessabit spector a tundere, et gemitus dare? Quoties vos congregatos video, in lacrymas ibo et suspiria? «Tempus lugendi¹, » et mihi et vobis circumscripserunt eloquia divina. Nec dolui, cum vos lacrymantem vidi; (et ad Lazari recordationem flevit Dominus Jesus Christus, et qui eum flentem videbant Judæi dixerunt: «Ecce »quomodo diligebat eum²:) imo potius, si quid in lacrymis jucundum, si quid gratum esse potest, illud e vestris collegi: dicebam enim intra me, Ecce quomodo diligebant eum; qui patrem tanto affectu prosequebantur, eumdem dabunt et filio, qui eorum pater factus est;

¹ Eccl. iii, 4. — ² Joan. xi, 36.

hæredem onoris facient hæredem amoris; qui succedit honori, succedit et charitati. Bonum ingredienti omen est¹, antiquæ in pastorem dilectionis in ovibus signa videre. Fiet amoris translatio in eum cui facta est curarum collatio? nec mutato pastore cessabunt eum diligere, qui debet oves pascere, cujus vocem audient², et qui Deo teste, conscientia teste, paratus est cum adjutorio Domini pro ovicularum minima animam suam impendere et superimpedere.

II. Si quæ ratio dolendi, si flendi, tota mea est, non vestra, non ejus, cujus tangimur desiderio. Solutus est ille, vincitus ego; stadium emensus, curro. In patria est, unde peregrinor: curas quas depositus, in sinu meo repositus. Clavum bene tenuit, de me quid fiet nescio: appulit, fluctuo. E littore videt iratum pelagus, furentes procellas: exclamo in mediis fluctibus, «Salva nos, perimus³.» Et vere perimus, et vere periculum urget, et vere caput meum impellit, non meum tantum periculum, sed et vestrum; nam sine vobis salvus esse non possum. Vestrarum animarum jactura, mea est. Quidquid Domino meo de vobis perit, periculo meo perit: rationem sum redditurus, «Pellem pro pelle⁴.» Misericordem Dominum habeo, sed rigidum computatorem: ovi culas suas quotidie numerat, has in manibus descriptas habet, exigit numerum, quem si non reddidero, ingens capiti meo periculum creatur. Videte, fratres, si sarcinam meam considerans a lacrymis possum temperare, si de gravio onere meo non mihi dolendum est. Pondus meum alleviate; faciet charitas vestra quod immane est mitius: et adjuvante Domino, et pastor et oviculæ pascua inventient, et post quam in meridie cubaverint, «Accumbent

¹ Vide i Retract. i, n. 3. — ² Forte et ejus vocem audient, qui. — ³ Matth. viii, 25. — ⁴ Job. ii, 4.

» cum Abraham, Isaac et Jacob ; ubi non erit sol, neque ullus aestus¹, » sed in umbra Domini pax et refrigerium, quando luctus noster vertetur in citharam, et voces flentum in cantus exultantium.

III. Cæterum, dilectissimi, dum de pastore erepto lugemus, nascitur de perduto fratre dolendi occasio. Præcism est a nobis membrum, pars nostri facta est pars Donati, transiit miles Domini ad castra Philistinorum, et de vase honoris factum est vas dedecoris. Intelligitis quid dico. Miser ille Rusticianus Mutigenensis diaconus sacramentum quod Ecclesiæ debebat, abjecit, et ordinem suum infideli participatione polluit. Quid non feci, quos non adhibui conatus, ut in præcipitum ruentem in plano collocarem, et eximerem periculo, qui periculum amabat in quo periit? Is prima et urgens fuit cura mea, qui nunc est dolor meus. Nolebam mihi subtrahi in ipso oneris mei exordio, quem a satis longo tempore videbam tanquam fulgur de coelo cadentem. Et licet ipse, exigentibus peccatis suis, a Domino deseriri meruerit; doleo tamen quod de eo ad Dominum meum dicere non possum, « Ecce me cum pueris quos dedisti mihi². »

IV. Vobis omnibus notum scio : et tam bene scio, quia scio vestrorum multis moras quas hic trahebat, displicuisse. Quoties venerandus noster Valerius, me præsente, cum visceribus paternis dixit ad eum, Quid hic agis? Cur stationem tuam deseris? Cur Presbytero tuo non collaboras? Cur Hipponem Mutigenæ prefers, cui alligatus es? Et cum responderet, se ad solitudinem minime idoneum, clericatum non monachatum iniisse se nullos Mutigenæ habere cum quibus versaretur; respondebat sanctus senex, « Alligatus es uxori, noli querere »solutionem³.» Tua est Ecclesia Mutigenensis, non nostra;

¹ Matth. viii, 11, et Apoc. vii, 16. — ² Isaï. viii, 18. — ³ 1 Cor. vii, 27.

ad eam nomen, non ad Hippoñem dedisti : nonne sæculo renuntiasti, nonne amicis, nonne sanguini? Audiebat di- centem, sed male audiebat, qui dicenti non obsequebatur. Quid factum est? Cum satis festivus haberetur, indolisque ad scurrilitatem proclivioris, inter nugas sæculi, inter convivia, et compotationes diurnas, sæpe etiam nocturnas, tandem defecit : extinctus est spiritus timoris Domini : de luto in lutum provolvitur : alternis vicibus et alios invitans et ab aliis invitatus, et conviva et convivans, cum æri quod contraxerat solvendo non esset, et a creditoribus urgeretur, et se quotidianis implicaret erroribus, et plurimis scandalum crearet, tandem a presbytero suo excommunicatus, ad Donatistas transfugit, et ab eorum episcopo non tantum exceptus, quod contra jus Ecclesiarum est; non tantum rebaptizatus est, quod impium est: sed etiam diaconus, quod maxime lugendum, factus est.

V. Hæc ego cum primum accepi, aberat venerandus senex noster Valerius : sed commota viscera dilationem minime passa sunt. Ingemui, dolui, pro eo in conspectu Domini mei effudi animam meam. Et quia mihi a multis relatum fuerat, Macrobiūm episcopum Donatistam, ad quem configuerat, virum esse pacificum, non longe a regno Dei et a concordia fratrum, qui si aliquos rebaptizaret, id invitus faceret : hunc litteris convenire statui, et quam obnixis precibus ad eum per amicos agere, ut in subdiacono nostro baptismum Christi non exsufflaret, nec iterum baptizaret, quem in nomine Dei et baptizatum et signatum fuisse non nesciret. Egre litteras nostras admisit : sed tandem Maximi et Theodori, quibus illud negotii injunxeramus, precibus adactus est, ut eas recitari sineret, et ipse etiam legeret: quibus nihil aliud respondit⁴, quam, « Non possum nisi ad me venientes suscipere,

⁴ Vide epistolam 107. inter Augustinianas.

et eisdem fidem quam postulaverint dare. » Cumque de Primiani facto instant; dixit, non esse filii in patrem inquirere. Et quia per litteras quas ad Macrobiū dedi, rogabam ut responderet quae coram populo nostro legerentur¹, si vero recusaret, me nostras recitaturum cum primum abessent milites. Hodie, fratres, fidem meam libero, nullus adest qui possit turbas cire, novi vos omnes ad concordiam et ad alienos amplectendos promptiores esse quam ut excitem, litteras ad Macrobiū profero, ut actorum nihil conscientiam vestram lateat; sed apud Deum et homines innotescat, quam sincero corde, quam pacifico affectu, inspirante Domino rem tractaverim. Quod si postea perit frater noster, in sua non in nostra conscientia peribit. Veniet Dominus, qui hos et me iudicabit: veniet certe, frumentum asserturus, paleam dispersurus. Aquas nostras, quas tantopere formidant, ipse examinabit, et coram omnibus manifestissime iudicabit, an quas pollutas duxerint; ipse quoque habeat. « Certe videbunt in quem pupugerunt². » Quid enim est aliud Christianum rebaptizare, quam Dominum iterum pungere? Signum regis accepit, crucem admisit, in morte Christi tinctus est: quid aliud facis, qui talem bis baptizas, qui regis signum exsufflas, qui crucem expungis, quam mortem Domini inanem et vacuam reddere, et universam salutis nostrae dispensationem ostentui habere?

VI. Aqua nostra non est aliena, virgo est et sancta; in fontem nostrum descendit Spiritus, quos irrorat sancti sunt: videant qua temeritate pollutos astruant, quos talibus undis aspersos noverint. O sacrilegam novitatem! o vocem impiam! Sanctificavit Deus aquas in initio mundi per Spiritus incubationem, ex eis tot et tanta pro-

¹ Confer Augustini epistolam 23, n. 6 et 7. — ² Joan. xix, 37.

dierunt miracula, quae de aquarum nostrarum sanctitate nos erudirent, et de veritate quorum umbræ erant, instruerent, et de regeneratione quam in aquis haurimus certos facerent, et eas alienas vocant, et ab his abstinent, et mendaces dicunt, et omnem eis fidem abrogant. Erit itaque verax aqua Primiani, quem tam immani anathematice percussistis, quem tantorum scelerum in vestro conventu reum judicasti: nec tamen quos baptizavit, iterum tinxit, et Ecclesiæ catholicæ, columbae nostræ, sponsæ immaculatae, infideles, impuræ, mendaces aquæ apud eos erunt? Dicent forsitan, Mendaces erant qui Primianum innocentem damnarunt, et ideo ejus aquæ mendaces non fuerunt. Sed quid dicent de Feliciano et Prætextato, qui Primianum damnaverunt, et ab illo tam grandi schismate discesserant? An quos baptizaverant, nova et recenti tinctione Ecclesiæ suæ pepererunt? Nequaquam. Feliciani et Prætextati aquæ fideles qui postmodum coierunt, et adversus Ecclesiam catholicam insani foederis communione conspiraverunt; aquæ vero nostræ infideles et profanæ? O insana et perversa cogitatio!

VII. Addunt etiam, « Qui baptizatur a mortuo, quid est lavacrum ejus³. » Erratis, miseri, non intelligentes Scripturas. Non dicimus baptismum quo tinguunt illi, quos velut mortuos a vivorum communione separamus, nihil esse; sed nihil prodesse, quandiu inter mortuos vivitur. Tolle quod obest, jam prodest. Quod extra acceptisti, proficiet cum intus fueris. Emenda baptizatum, sufficit: latens in semine virtus, incrementa sumet: spiritum Dei ex alto induet; et qui in Christo per baptismum sepultus fuerat, licet foris, postquam in Ecclesiæ sinum admissus fuerit, et mortuos reliquerit sepelire mortuos suos, sentiet aquam fidelem, nec haëreticorum

³ Eccl. xxxiv, 30.